

臺灣鄭氏始末

臺灣鄭氏始末卷四

德清沈雲撰

烏程沈 奎注

十五年春正月多羅信郡王多尼會平郡王羅可鐸貝勒尙善杜蘭都統伊爾德阿爾津巴思漢卓羅等統兵進取雲南二月延平簡勇士力勝五百斤者爲親軍使上官馮澄世造鐵甲冑試以箭不入又造鐵面繪如神鬼每士一人副二人執斤斫馬足有進無退號曰鐵人
以左虎衛陳魁統之三月右虎衛陳鵬敗許龍於南洋俘其眾定國將閆維龍曹延生攻克廣西橫州夏四月李國翰微定國軍於全州三桂遣兵克重慶成功遣楊廷世詣永歷告師期以薛聯桂爲思明知州楊來嘉佐

黃廷洪旭佐泰分鎮金厦鄧會督糧饟五月以中提督
甘輝統前軍右提督馬信統中軍後提督萬禮統後軍
成功自統大軍凡水師五萬騎射五萬步擊五萬遊軍
策應萬鐵面軍萬猛將數千戰艇數千北上澄海遊擊
劉進忠率眾以城降授進忠後衝鎮永厯寶康侯賀九
儀遣將曹友攻賓州不克羅託等略下沅靖進克平越
鎮遠卓布泰略下南丹那地撫甯各土司進克獨山三
桂等自重慶分擊定國文秀軍連敗至水西皆遞遂克
遵義別將克開州六月延平軍攻降平陽守將車任進
瑞安守將艾誠祥進攻溫州不下秋七月抵洋山山故
有龍祠過船必以生羊祭畢即縱之山上日久孳乳羣

隊滿山延平軍士競逐之成功又不致祭天朗波平怪
風卒至戰艦自相樅擊義陽王及成功三子霄裕溫甲
士數千人皆溺既禱乃息遂還舟山葺戰艦八月永厯
仁壽侯譚詣等攻重慶九月象山知縣徐福率父老迎
降延平時有言北將謀叛者成功罷賀世明以姚國泰
代又遣張英諭樸世用魏其志李必張魁悉解兵權爲
監督世用憤死劉進忠因不自安冬十月率眾奔黃巖
海門衛納降周全斌追至海門圍之進忠突圍走全斌
不追遂據其城十一月破盤石衛樂清縣西五十里令諸提鎮
就汎休養十二月屯沙關籌餉樂清縣東有白沙承疇嶺嶺東有關卽此
遣攻水西宣慰司安坤降定國文秀入貴州都統明安

達禮俄羅塞臣賽音達禮護軍統領席伯臣車爾布等
各統大兵會承疇分割貴州防禦大將軍多尼會吳三
桂卓布泰於平越之楊老堡分三道進攻雲南多尼自
桂陽入斬劉將軍於安莊鞏昌王白文選遣將焚盤江
鐵鎖橋尼堪軍作浮橋以濟文選拒戰松嶺衛不勝三
桂自遵義入攻七星關文選屯兵堅守不下乃轉水西
苗界間道度關襲其後克之遂進烏撒卓布泰自都
勻入抵盤江之羅顏渡口文選遣將李成爵扼險沈其
船定國亦率兵來援屯雙河口山頂而卓布泰軍從下
流十里取所沈船乘夜潛渡襲斬成爵於梁瑞津遂會
諸軍四合張左右翼奪擊定國定國退守陸格樹寨堅

拒諸軍以火器圍擊再戰再截定國兵不滿千轉戰四十餘里左右衝突大軍累萬圍數十重而火器熱不可執戈刃交前百不當一定國鼓銳奔之所向騰踐披靡莫敢仰視遂衝重堅奔據鐵鎖橋則已先焚不可據乃從普安閒道入雲南三道大軍俱追滇都定國文選扈永厯奔永昌初孚遠取道交趾入安龍交趾要以臣禮不可阻不得前返廈門後孚遠隱吳六奇所得全髮死其子歸柩松江未葬子亦死十六年春仁壽侯譚詣攻殺其兄譚文脅新津侯譚宏降北封宏慕義侯詣向化侯分平西王駐雲南平南王駐粵東靖南王駐四川二月延平還盤石衛調兵閏三月癸亥三桂卓布泰等攻

永昌壬申定國扈永懋奔騰越三桂等渡瀘江定國與忠勇伯寶名望伏磨盤山左右偵三桂騎至突出截擊幾斬三桂大軍還戰獲遯免而卓布泰八隊合圍名望戰死定國突圍走石門扈永懋過南甸追至定國遣馬雄飛鄔昌琦護鹵簿先趨孟邨而身自斷後又追及定國扈入三宣六慰斬孔廷訓有德以謀劫降故夏四月辛丑由蠻漠遷河口水陸分進文臣舟從者六百餘人武臣陸從者九百餘人馬亦如之戊申舟次井梗定國遣文選率兵迎駕往壓哇城爲緬人所阻不爲達時距駐蹕處五十餘里文臣侍從皆畏緬人莫敢通文選既拔營去庚戌舟次沙河口水陸行者至壓哇對河距城五

六里屯息緬人疑爲變集眾戰鬪朱蘊金姜承德等死
者大半餘亦潰散延平軍抵崇明總兵梁化鳳堅守不
下乘風趨瓜州遣監紀劉澄約提督馬逢知爲應令馬
信黃安蔡文黃昭藍衍率銳師居前周全斌居中甘輝
居左洪天祐居右萬禮居後羅蘊章參伍策變張煌言
奉檄傳諭五月辛酉朔緬王具龍舟鼓樂迎承厯宿衛
僅百餘人遂止不出定國書三十餘上爲大學士馬吉
翔司禮監李國泰所沮不報六月辛卯延平軍抵焦山
斬巡江營都司羅明升於談家洲丹徒縣西北六里以
存沙洲橫列江中以
蔡文守焦山丹徒縣
東九里令村官張亮率善泅者斬滾龍鎖
前軍先登亮圍瓜州江都縣南
四十里江防同知徐騰鯨遯陳

澤追斬遊擊左雲龍於大來橋生擒操江朱衣祚成功
曰此腐儒也縱之蘊章督軍士焚木浮營三寨俘斬數
千以劉猷守瓜州何平理江防事庚子遂泊鎮江南岸
前軍屯銀山下府西二里守將遙見鐵人駭甚反走乘之遂
破其柵副將高謙出援全斌爲圓陳持盾外向射之不
動火器衝其中忽中分若衢而左右角銳進裏而截擊
之奔殪不相顧謙跳入城全斌遂奪門入謙與知府戴
可進等十四員兵眾數萬皆降成功以謙爲破鹵將軍
馮澄世爲常鎮道李徵爲知府林若霖爲理刑丁未荆
州衛糧官來降擢其首爲衛指揮使餘量授千百戶太
平府守將劉世賢遣使迎降加世賢鎮南將軍己酉略

取江浦遣羅蘊章分兵守鎮江蕪湖以降書至遣張煌
言守蕪湖韓鏞守江浦儀真吏民迎降持牛酒揚州文
武棄城逃吏民來請遂遣將分守勞民馮澄世潘庚鍾
說成功緩取南京先設揚淮瓜鎮重兵以斷南北饋道
扼各路要害以絕外援遣使定國會師則南京可不勞
而定也成功曰定國邂逅無處所且萬里援師不足恃
大兵分防各省皆數十萬永歷諸將削平大兵凱旋在
卽我分兵以守執弱不足當庶神速取南京得形勝守
要害傳檄天下反正勤王定國等不召自至南都未得
譬諸堂奧空虚何淮揚門戶之有遂使周全斌高謙益
兵守鎮江京口楊朝棟招撫江南袁起震徐春招撫江

北有陳文達者統戰艦二百餘艘來歸授指揮鄉道使
時延平聲勢大振旬日之間江南北相率迎降府若太
平甯國池徽州若廣德無爲滁和縣若當塗繁昌宣城
甯國涇黟南陵太平旌德貴池銅陵東流建德石埭青
陽含山舒城巢沛廬江高淳溧陽建平句容分將撫安
若虞不給常鎮淮徐望風引降文武棄城奔走者絡繹
不絕而內大臣達索爲安南將軍會都統索洪護軍統
領賴塔等統大兵二十萬來援成功遂進取南京至觀
音門江甯外郭北而三門最西曰觀音令黃安總督水師泊三汊河口
三新河口近成功山儀鳳門登岸
草窠夾通口
西出從北第一門率
在三汊河口東北
諸將觀鍾山形勢祭太祖列宗而還鍾山在府治令甘東北十五里

輝余新屯獅子山

府西北二十里亦名盧龍山

萬禮楊祖屯橋山上

洪天祐爲援馬信郭義黃昭蕭拱宸屯漢西門陳魁陳鵬藍衍蔡祿屯東南隅結水寨劉巧楊正戴捷劉國軒屯西北隅環山爲營而自帥張英陳堯策王秀奇林習山等屯嶽廟山與諸鎮營壘雲連勢結首尾相迎巡撫蔣國柱率將士數千騎薄營余新微之大敗單騎遁復爲遊卒所禽覓成功呼萬歲憐而縱之郎廷佐管効忠等方議降未決會崇明梁化鳳及參將張國俊遊擊徐登第等各率水陸兵數千閒道至國柱衣祚依化鳳突圍至城下縋而入與總督廷佐巡城雉東北隅敵營少備聞大兵旦夕將至議出奇夾擊衣祚曰是有門曰神

策

在太平之西金川之東是年因勝成功於此改名得勝

化鳳大喜秋七月貴州

凱旋副都統噶褚哈馬爾賽等由荊州浮江赴援陳魁等逆戰大敗之王戊都統劉之源統水師數萬與噶褚哈等合擊魁鵬等眾藍衍蔡祿撒汕豆敵艦上而眾以矛擐乘之溺斃過半水爲之塞甲子都統哈哈木等統水陸師會戰余新洪天祐分兵拒擊張英林勝督鐵人截攻陸路北帥見矢刃不能傷而斫足競前莫却駭避入壁水師又爲天祐等所敗延平屢勝兵益驕諸將爭功互相訐成功令非有令擅自進取者不爲功越營爭勝者功敘本營他營非危急不得相救庚鍾諫曰將士奮勇貪功勿苛責以挫其鋒且敵兵已數十萬朝夕益

至吾軍止有此數非連營速戰乘勝合攻不可都城久
圍不下或有他虞諸城降納不足守勝則速來敗亦速
去爲今日計不如發令諸鎮并力水師爭先取勝以吾
所長攻彼所短果能盡覆其水路諸軍殲其渠帥橫江
塞隘則陸路軍亦膽落神飛而後乘銳并力靡不濟矣
不聽庚午達索等大兵繼至分兵會戰水營而分陸路
兵渡江攻擊延平諸鎮各自爲戰勢已不支且北兵蜂
集雲奔見勝則進小敗卽退朝夕更代以逸擊勞以飽
擊飢以多擊少如是者旬有五日延平士卒日疲器械
日敝氣衰糧匱衆敗欲崩庚鍾曰勢急矣速令并力自
全相機退守以圖再舉又不聽甲申夜化鳳等率精騎

穴城出攻余新營北軍夾之遂禽新盡俘其眾連攻拱宸等營連破之及萬禮等奉令來援而化鳳已入城去甘輝及庚鍾諫成功退屯觀音門連營合陳不必待令爭相救護又不聽乙酉達索統大兵圍擊甘輝張英索洪圖擊林勝陳魁哈哈木等分取姚國泰楊祖藍衍楊正而水師諸鎮爲劉之源大兵所圍橋山寨爲賴塔等所圍西北劉國軒諸營爲噶褚哈大兵圍守嶽廟山諸屯又爲馬爾賽張國俊徐登第據隘環攻成功張黃蓋山上望大兵無不以三圍一以十并二神器雷轟矢石雨注方急遽不可爲計而耶廷佐梁化鳳各選精騎裹合擊鋒銳不可當乃令庚鍾代蓋下指揮自趨江下

整舟師合戰而被所焚溺已五百餘艦觸折滲損無計
算急帥周全斌劉猷楊富冒矢石衝堅力戰拔諸將出
排沙嶼瓜鎮已破前降諸府縣守者多亡失潘庚鍾萬
禮張英林勝陳魁藍衍李必魏其志力戰死軍中甘輝
余新被禽亦死收殘卒亡歸者什不二三成功大勦曰
悔不用諸將軍言敗棄若是欲自刎以謝死者全斌及
諸將泣諫乃止遂縞素哭祭悲號咽江躬巡弔卹撫創
痍遣使奉表永厯請貶王爵八月次吳淞港遣蔡政齋
書馬逢知所都統劉之源爲鎮海大將軍駐鎮江慶陽
王馮雙禮兵敗走四川德安侯狄三品執之北降授三
品抒誠侯濟安伯朱養恩等以嘉定州降北巡撫高民

瞻兵克成都成功攻崇明梁化鳳以礮擊死正兵鎮韓英監督王起鳳等遂退九月師還思明前使永厯者道阻反命諸將請仍王號冬十月劉猷往溫州徵饒遇北軍戰沒時安南將軍達索等移兵福建由溫州進十七年春正月遂抵福州三桂等敗定國軍於普洱奏稱滇南負固有年一朝戡定獨永厯在緬李定國白文選分屯三宣六慰等處窺我邊防患在門戶號召諸蠻患在肘腋投誠生心患在腠理請大舉入緬以靖根株三月安南軍抵泉州會總督李率泰提督馬得功海澄公黃梧總兵施琅調甯波溫台各水師檄廣東碭石總兵蘇利南洋總兵許龍饒平總兵吳六奇合兵會勦率泰遣

盜持孔雀膽賂成功庖人張德伺成功宴諸將毒之德以付亨人王回回告其父父曰事主而毒之不忠孰甚遽擊回持膽報成功遂捕德磔之而厚錫回父以獎其忠改右提督馬信爲提督驍騎親軍與忠正伯林習山守笠嶼卽列嶼在同安東南八十里輔明侯林察總督水師與中衝鎮蕭拱宸屯崇武所在惠安東禦泉州兵夏四月安南進泊圍頭卽令察等屯劉五店在同安東少傅泰與護衛左鎮黃安守金門城仔角五軍戎政王秀奇督右虎衛陳鵬殿兵鎮陳璋守五通高崎五通嶼在同安東南七十里高崎在五通之西鼓浪之東厦門之北雜浦嶼之東南多大石前衝鎮劉巧後衝鎮黃昭左衝鎮郭義援勦前鎮林明屯同安港逆戰闌安

侯周瑞忠靖伯陳輝護衛右鎮鄭仁援勦右鎮林順泊
南山麓過海澄兵前提督黃廷右武衛周全斌統蒙衝
二上載火物而帷之伏後聞發英兵鎮陳瑞護王侯伯
以下細小過笠嶼金門而空廈島成功督五府陳堯策
等於鼓浪嶼廈門西北指揮號令忠振伯洪旭屯鎮海
旂尾往來策應即岐島大武口高千仞屹立海上其南
對岸上癸丑夜陳鵬約率泰兵出高崎當迎應飛渡廈
門率泰喜諸五月乙卯朔梧潛師出海門成功遣堯策
約各鎮聞礮起棹堯策到周瑞船而海門師大至不及
他去礮擊瑞船堯策與瑞俱死陳輝督眾鏖戰負重創
索洪進同安港海門在鼓浪西同安港在海澄東賴塔鼓溫台水師攻

高崎率泰前進應鵬達索施琅統大軍繼至成功千旂
劍問左右流平否曰平矣曰平則潮轉風隨令發礮火
艇雍上流壓大軍兩岸纓轡競轉竹緇貫沈樹火起鵬
約親軍爭登岸應敵而副將陳蟒性直不可通故大呼
發礮擊敵陳璋奮軍鉤逮斧近擲瓜礮敵軍蹂踐陷淤
淖鵬愕然計左則亦麾眾助戰率泰落水逃免達索戰
艦絙銳枝半皆沈覆施琅以小舸援達索開道邀成功
令何義代已而白乘飛艇督諸鎮合戰索洪泰帥水師
鎮蔡叶吉由浯嶼進發截溫台圖艦黃廷等縱火於鼓
浪嶼後夾攻賴塔風起潮湧煙燄漫天馬信督神弩軍
圍梧全斌復以竹器洋礮橫擊之梧兵盡覆索洪賴塔

鄭四

十

皆聚軍逃竄北軍奔殪焚溺死者以億萬計水爲不流
成功知鵬有變密遣洪旭往勞伏勇士焉鵬喜未泄與
旭飲歡甚引鵬送江潯勇士突起縛鵬部眾大譁得陳
璋程應璠曉之乃定成功責鵬交通狀伏辜遂磔以徇
時吳六奇遣將馬嵩至潮爲刺客所殺許龍蘇利聞大
軍已敗退還逃帥達索等皆以馬得功軍獲全得功屯
黃崎惠安東北不進故也成功厚卹周瑞等擢陳莽右虎衛
何義左虎衛陳璋宣毅左鎮俘獲軍實分賚諸將士舉
之數月不盡六月尙書車克納都統索渾統大軍會福
州秋七月耿繼茂移駐福建都統宗室羅託爲安南將
軍會大將軍達索等相機進勦成功使張光啟如日本

乞師八月議棄舟山地明安達禮率滿兵還京內大臣
愛星阿爲定西將軍征李定國九月李率泰奏還同安
之排頭海澄之方田沿海居民八十八堡入內地安插
成功因議取臺灣招沿海之不願內徙者屯田其中以
益軍儲冬十月魯王卒成功與兵部侍郎王忠孝禮葬
之金門後浦十一月光啟使還言日本上將軍不允發
兵助銅噴鹿銃倭刀爲備十八年春正月成功集諸將
議曰吾聞臺灣北白雞籠南至浪嶠千里而遙東自多
羅滿西至王城千里而近風便自雞籠淡水趨福州港
口五更可達自臺灣港至澎湖嶼四更可達海道不可
以里計舟
人分一晝夜爲十更故以更計道遠近

澎湖至金門七更可達東北至日

鄭四

本七十更可達南至呂宋六十更可達中多大溪流入海水澹曰澹水洋雞籠名東番亦名北港有數十社社大者戶數千社小戶數百俗習走過奔馬土宜五穀竹數拱長十餘丈其鏢鎗竹鐵簇試鹿虎輒中後避倭難稍稍居山後我太師初開臺灣事耕植通商販密邇漳泉地廣而腴至今爲紅夷所據屹然一大部落我將復之以裕兩島進可戰退可守況茲遷民播棄失業者多招之以耕以戰兵食兩足良計之得也已而臺灣甲螺何斌持地圖來獻遂檄南澳陳霸備許龍蘇利參軍蔡叶吉佐少傅泰守金門郭義蔡祿往銅山協張進防禦洪天祐陳輝楊富楊來嘉何義守南日湄州崇武閩頭

防護金門

金門東北至圍頭又東北至崇武
又東北至湄州又東北至南日

洪旭黃廷

王秀奇杜輝林順陳永華及其兄子繩武馮澄世之子

錫範等佐世子經守廈門而自率弟襲及馬信周全斌

蕭拱辰黃昭等數十鎮東征二月次澎湖巡視三十六

嶼

澎湖島在臺灣縣西大海中西與金門相望東至府
城五十五里三十六嶼泛若水中之島其最大而居中

者曰大山嶼縱橫三十餘里

分將守之曰此臺灣門戶是矣諸將軍

唯寡人鵠首是向勿以紅夷礮爲疑抵鹿耳門成功曰

此古所謂落漈與

漈者水趨下不同也

使測水深丈餘額手謝曰

天興我也潛軍循圖委折至赤嵌城登岸斌曰速據倉

廩乃以兵進不然遽則燬矣從之守赤嵌城酋長苗難

實丁遣何機走鯤身請援成功令諸將持神器傳城遣

通事吳邁說曰不速降皆灰燼矣苗難實丁懼以眾降
成功厚賂之令說揆一王曰臺灣吾故物久假當歸而
揆一王已遣酋長英黎三來禦道遇何機機謂唐兵實
由天下非傾國以赴不可還請濟師成功因得整軍速
進徑抵臺灣令黃昭伏鯤身尾楊祥繞出鯤身之左擊
其虛而奪之蕭拱辰以水師截其夾板皆伏以待全斌
速伐大竹環布革若城多張旗幟鉦鼓飛卒譟誘而內
昇坎焉蓋紅夷專恃火礮鎗銃無他長登高遙望發大
礮轟擊城則假而復起屢擊屢起遂盡挾鎗銃噴弩前
趨奮擊楊祥自後突起昭三面蹙之紅夷軍全覆坑陷
中而成功速兵奪門火器奔下不獲前士卒傷乃退於

七鯤身礪土石環濠以自衛是月白文選密遣緬人齎
表承愿議要緬王送駕出已作浮橋距行在六十里將
渡以馬吉翔李國泰撓阻不果行夏五月改赤嵌城爲
承天府楊朝棟爲府尹置天興在今臺灣縣東四十里萬年縣東南二
里十二縣以祝敬莊文烈爲知縣黃安顏望忠等率師繼
進授安爲右虎衛招沿海居民之不願內徙者數十萬
人東渡以實臺地初黃梧盤沿海多富商大賈勸率泰
奏遷海澄內地民皆破產哀號自盡至是爲成功所招
梧由是吞噬莫遂大怨成功與施琅計間成功守將銅
山北自金石接梧嶼南自梅嶺達廣東西南接元鍾所
較諸守者爲最要郭義蔡祿初約萬禮爲兄弟及禮死

鄭四

江南之役還祀忠臣廟中首甘卿次禮復覈禮實逃軍
後溺死遂撤不祀因懷不平六月祿遣將陳華羅棟揚
言南洋許龍兵將至分據要害劫忠匡伯張進欲俱降
梧進佯諾密與呂簇圖義祿不獲進自焚死世子經聞
變遣黃廷洪天祐陳霸合討義祿遂大掠城中與察言
司薛聯桂等由八尺門納降達索等統大兵至則洪天
祐黃元益兵守銅山不敢進又恐成功自澎湖奪福州
乃還梧以招撫都督萬儀萬祿等奏入而急與尙書蘇
海納劫掠沿海居民塗炭殆盡秋七月土番阿得苟攬
聚眾欲救紅夷楊祖與戰敗死成功令黃安陳瑞設伏
誘斬之躬巡川野慰撫諸社寨酋長及新遷居民令皆

按堵樂業益繕甲兵堅城守揆一王自是閉城堅拒無
所得食八月梧會蘇海納統兵開道毀鄭氏祖墓盛其
屍置獄中而芝龍及子世恩世蔭等以冬十月無少長
皆棄柴市十一月成功令陳廣等焚紅夷夾板黃安率
眾自鯤身合攻揆一王勢蹙遣通事李仲說曰此去荷
蘭遠不可久駐約自倉庫外金玉珠寶悉載歸遲將莫
及揆一王與諸酋長如約還荷蘭成功祭告天地山川
置社稷宗廟學校改臺灣爲東都今縣西南有廢城城曰安平
是月三桂愛星阿會師木邦晉王李定國奔景線鞏昌
王白文選遯據錫波江大軍造筏將渡文選復奔茶山
爲總兵馬甯等連敗至孟養文選降封承恩公三桂愛

鄭四

星阿進攻緬城十二月戊申緬人請移蹕皇太后皇后
皇太子同行夜渡河三桂等遂執永歷由殺華亭侯王
維恭等一百餘人越年定國在景線病死成功殺朝棟
及敬爲刻減兵糧故以鄭省英爲府尹令黃安城守撫
眾周全斌總督承天府南北路分地開墾圍生牛而教
之耕鄉仍曰社田仍二十五戈爲一甲三年然後定賦
限溝渠時畜洩毋聽民兼并買賣察舉孝弟力田及有
奇才異能者試用諸將以時簡肆武備嚴守望糾姦宄
如律

臺灣鄭氏始末卷四

臺灣鄭氏始末卷五

德清沈雲撰

烏程沈 奎注

康熙元年春正月成功聞冢兆慘發父被族誅擗踊大哭帥諸將以下皆縞素二月命洪初閩等分理社事成功切齒梧等未及報病肝急或告南澳陳霸有貳心卽遣全斌往擊霸聞之曰辨無及矣中梧等姦計不自察卒以兵逼如是而往眾畔親離無日矣豈掘冢之應墮地若斯雖然霸不忍爲梧用也乃率諸將避粵東去全斌獲其子士鼐復命以杜輝代守南澳夏四月兵部司務林英奔告緬事諸將請更朔號成功曰不可傳聞異辭審而後發喪擇立宗室之賢者乃改元朔諸將以爲

然初世子經取尙書唐顯悅女孫爲婦不相得私於其弟之乳媼陳氏生男詭謂侍妾出者告成功諸王及邑之大夫皆賀而顯悅責成功書謂禮有入母乳母居一世子與狎當何臯成功暴怒卽令都司黃毓與少傅泰斬經及陳媼及所生男并斬夫人董氏以理內不職也諸將大駭莫敢諫少傅與毓議殺陳媼及所生男而諸王以下合表爲夫人世子請遂以兩級付毓報成功成功愈怒解所佩劍促毓詣少傅少傅令遂見經經拘毓與眾議未決而參軍蔡鳴雷在臺行多不法恐見誅奔愬經所已密諭全斌等將至矣令必盡誅乃已洪旭曰世子不可以拒父諸將不可以拒君唯少傅兄可以拒

弟遂告少傅趙林順統舟師守大擔

樊在厦門前同安縣東南八十里

會全斌征陳霸還黃廷勸世子出不意執之使黃昌攝其軍成功聞諸將拒命憤甚遣洪有鼎馳諭全斌有鼎至銅山聞全斌被執不敢前五月癸酉朔成功病強掖黃安登將臺望澎湖有船東至否安曰無之梧琅奸計北既赤族又將滅是中冓事隱安見顯悅非爲梧琅者願王勿疑疑則左右皆義祿霸等父子至親且若是宅更何以自處成功益忿怒狂走越八日庚辰嚙指而卒年三十有九弟襲與黃安馬信遣人奔赴金厦信慟哭不絕死眾將請襲權政爲鎮撫計而蔡雲李應清曹從龍張驥謀遂奉襲告黃安安持不可又說黃昭握重兵

擁戴昭諾遂與蕭拱辰合謀拒經而襲弟成賜潛軍往
廈門道遇許龍兵被執繼茂率泰遣使招經經請比朝
鮮行事秋八月使再來令先繳所陷州縣印卽爲奏請
經與泰等議曰先王甫荒東土不幸卽世內靡有定其
何外侮之能膺懼而受撫則無以見吾先王不受又左
右無以應敵不如姑受令焉以緩須臾乃使楊來嘉上
州縣印十五率泰遂送來嘉北上且揚言鄭泰洪旭黃
廷等將密獻兩島入奏以閒經心經竟以兩島屬少傅
加全斌爲五軍都督率以東征冬十月抵澎湖先遣鄭
斌至安平告諭諸將面視莫敢言獨黃昭等拒命遂進
師西嶼

澎湖三十六嶼之正西嶼昭率兵守寮港曹從龍守安平礮

臺蕭拱辰守洲仔尾張驥自鹿耳門蔡雲李應清自赤
嵌城合兵拒戰全斌說經乘大霧登岸背水列陳驥等
聞水聲人語呼謀縱擊經軍却全斌呼曰却則溺矣諸
將奮死前戰潰驥陳而昭等合師來援昭先中流矢死
眾亂反走遂乘勝進日中霧散全斌持旆周呼曰世子
至矣黃安率諸將倒戈來迎經免胄籲眾出矢言令鄭
斌勞襲至則待之如初斬拱辰等五人餘不問偶於黃
昭營中得少傅泰與昭書令奉襲拒經而白據金厦云
經秘之初不意爲繼茂等反間也十一月經與全斌巡
南北路十二月來嘉還思明洪旭令仍守崇武遣使告
經二年春正月經使顏望忠守安平黃安督承天府南

北路而自率全斌等還思明卽王位稱永厯十有七年
諸將皆賀少傅泰稱疾不至遣鄭斌視疾還或言來嘉
北使還與少傅往來密甚三月王鐵佛等攻延建率泰
會梧等往勦而梧將有以海澄來獻者經密令諸將整
師泰疑爲圖己也載妻孥出泊港口或勸泰出降泰曰
先太師誤矣泰豈再誤已而知海澄有備經不果行經
與全斌謀鑄金以總制印遣鄭斌吳慎齋赴泰所言經
已決意東行兩島唯伯父總制泰喜受命然未敢躬往
稱謝其弟鳴駿謂曰骨肉至親土地重寄又何疑焉泰
意稍解夏六月經使劉國軒護輜重東渡鳴駿力勸泰
見經經與之語及成功相持慟哭且誦屬經理兩島事

越日置酒邀泰酒半經擲杯左右縛泰出與昭書示之泰急切不能自明遂縊殺之遺全斌籍其家鳴駿及泰子續緒陳輝楊富何義楊來嘉蔡鳴雷等文武四百餘員海艦二百餘艘士卒數萬奔泉州納降封鳴駿遵義侯續緒慕恩伯餘各授職有差秋七月和蘭揆一王遣通事李瑞乞師於繼茂率泰攻兩島復臺灣故地乃集眾議或曰紅毛古不通上國萬厯間嘗駕大艦攜巨礮薄香山澳求互市不得海澄奸民李錦引據漳南澎湖嶼侵奪臺灣地築室耕田其中天啟初掠漁舟六百餘艘役華人運土石築城尋犯廈門泊舟風櫃仔出沒浯嶼白坑東椗莆頭古雷洪嶼沙洲甲洲閒海寇李旦等

復爲之助海警戒嚴崇禎中爲鄭芝龍所破不敢窺內地者數年十年駕大舶由虎跳門游廣州主奸民李葉榮交通總兵陳謙爲居停出入爲兵科凌義渠所劾坐逮訊奸民知事不成復引番入據臺灣鄭氏奪復故土而今引紅毛克鄭氏若據臺灣要互市以閒寇掠閩粵閒誰復承其咎也率泰曰誰復爲百年計功舉日前事耳吾聞紅夷去中國絕遠其巨舟長三十丈廣六丈厚二尺餘樹五桅後爲三層樓旁設小窗置銅礮桅下置二丈巨鐵礮發之可洞裂石城震數十里世傳紅夷礮卽其製也柁後置照海鏡徑數尺能照數百里其人悉奉天主教所役使名烏鬼入水不沈走海面若平地然

以舟大難轉其人又不善戰故再爲鄭氏所敗今若資其所長先進以挫其銳繼以新降將士俾力戰以樹功而我以大兵承其敝蔑不濟矣乃允揆一王爲前鋒使提督馬得功督降將卒數萬繼進經遣全斌督林維等分禦諸隘陳昇守高崎黃廷道南山林順道遼羅策應經白牽洪旭王秀奇等屯大擔笠嶼冬十月全斌分諸將引戰紅毛巨艇於沙淺處焚之過半焉得功來援溺水死林維等追敵及海門爲琅將守備汪明等所微戰死繼茂帥總兵王進功等截戰於雲霄鎮全斌敗却聞陳昇已降梧高崎失守眾益潰敗琅統大兵擊延等不利復會紅夷夾板以大礮轟擊廷軍大敗琅遂乘勝奪

廈門順等聞昇已降不敢出戰琅梧合兵進擊斬千餘級遂取浯嶼金門墮城郭俘寶玉繼茂遣人至銅山招經又遣人告洪旭等有執經獻者當封爵比海澄公守泉州旭謂經曰勢急東渡否則變生肘腋奈之何經乃遣心腹護孥屬先行且諭眾文武其不願東遷者聽十二月蜀中晉王朱宗蕩及郝搖旗等皆敗繼茂遣將克長腰東蚶二島永厯兵部尙書阮春雷左侍郎張煌言僅以身免三年春正月琅遣招林順舉眾降二月南澳守將杜輝率眾赴揭陽港納降甯靖王瀛溪王魯世子巴東王諸宗臣及故臣王忠孝辜朝薦沈佺期郭貞一盧若騰李茂春等從經東渡馮澄世舟至東槎爲其僕

所殺若騰卒於澎湖經自往祭以洪旭言於澎湖姥祖
宮左右分營立壘中置礮臺令薛進思戴捷林陞守之
四閱月而代三月甲子周全斌質其子於李率泰而自
率將士數萬從鎮海衛納降丁卯率泰會繼茂王進功
黃梧統兵至廈門都督將軍翁求多率將士六萬降丙
子夜半渡海進拔銅山降永安侯黃廷都督余寬以下
及兵民三萬餘口遂盡驅沿海居民入內地築牆爲界
縱軍士大淫掠殺人山積海水殷然夏四月經改東都
爲東甯升天興萬年縣爲州設澎湖及南北路安撫使
諸將分守土地庶事悉委陳永華崇尙儒雅與民休息
而兩島遠近棄兵民眾凡四五十萬秋七月福建提督

水師總兵官施琅爲靖海將軍進攻臺灣遇颶風還八月浙督趙廷臣遣將由懸山花嶼乘漁艇入小港繞山後突入帳房禽煌言及其黨眾得視師兵部銀方印一關防九七年春明珠蔡毓榮與李率泰俱至漳州使興化府知府慕天顏持書招撫經仍以自比朝鮮爲請遣柯平葉亨入奏不報十年夏耿繼茂子和碩額駙耿精忠襲爵爲靖南王十二年春平南王尚可喜疏請歸老遼東秋七月平西王吳三桂靖南王耿精忠並疏請撤藩八月尙書梁清標等分往雲南廣東福建經理撤藩事宜十一月丙戌三桂拘經理侍郎折爾肯等殺雲南巡撫朱國治自稱天下都招討兵馬大元帥以明年甲

寅爲周王元年總督甘文焜自殺貴州巡撫曹申吉提督李木深以下皆應乃停撤平南靖南二藩梁清標陳一炳召還削三桂爵十二月甲子偏沅巡撫盧震棄長沙逃沅州總兵崔世祿被執十三年春正月四川巡撫羅森提督鄭蛟麟總兵譚宏吳之茂以四川降二月常德總兵楊寶應知府翁應兆長沙副將黃正卿及澧州守將並以城降廣西將軍孫延齡殺都統王永年副都統孟一茂等執巡撫馬雄鎮以叛三月耿精忠以福建反總督范承謨死巡撫劉秉政降約經統舟師徑取南京與三桂爲鼎峙經告藉漳泉地以募軍士精忠不許鄖陽副將洪福以所部叛襄陽總兵楊來嘉據穀城叛

並遣使告經仍用永厯正朔夏四月湖北總兵蔡祿謀以兵應來嘉不克誅死潮州總兵劉進忠以城降精忠與續順公沈瑞兵巷戰大敗之遂引兵據守三桂子應熊孫世霖誅死延齡削職精忠削爵經遣馮錫範劉國軒帥師徇漳泉屬縣五月經至廈門同安知縣鄧世茂來迎海澄總兵趙得勝同安副將張學堯遊擊花尙蘭皆叛精忠來降授得勝左提督與明伯學堯侍衛將軍泉州兵遂精忠守將王進殺總兵賴玉來降五月平陽兵執總兵蔡朝佐與精忠將曾養性合圍瑞安六月總兵祖宏勳以溫州叛羅清黃嚴太平諸營相繼叛延齡寇柳州精忠遣李連李泰攻建昌杉關柯昇叛廣信以

應精忠甲辰經入泉州以前提督王進功子藩錫爲指揮使何可化爲提刑道王者都仍守知府事郎中周襄緒等招諭精忠而尙可喜攻進忠潮州甚急精忠將李雲龍張雄攻常山開化爲金華副將牟大寅所敗雄死乙卯進忠稱臣求援經授進忠右提督定鹵伯遣陳天祐金漢臣救潮駐軍南門外鳳皇洲一名老馬洲可喜出不意來攻天祐等俱戰沒秋七月南瑞總兵楊富叛應精忠事覺伏誅精忠遣將兗石城遂攻甯都爲遊擊周球所敗進忠遣將據程鄉縣旋爲官兵所破精忠將閔標攻金華爲將軍喇哈達所斬精忠合兵圍衢州八月又分攻處州金華龍游仙居諸暨新昌甯海象山餘姚遂

安岷縣進忠將劉斌克據普甯海澄公黃梧率子芳度
降精忠已而復叛殺其將劉豹等三人固守漳城黃巖
總兵阿爾泰降精忠三桂兵陷徽州祁門歙縣可喜遣
人招進忠不受斬進忠副將陳璉等九月精忠將王進
攻泉州經遣國軒大敗進於陳潼關仙遊縣南白水駟
惠安北五十里乘勝偏興化別以馮錫範趙得勝爲左右提督
攻漳浦降其總兵劉炎投前鋒鎮定南將軍精忠懼使
張文翽詣泉州請和以楓亭爲界仙遊東南五十里東
南去惠安五十里許之來嘉兵攻南漳敗三桂兵攻袁州精忠
兵據建昌廣西提督馬雄總兵郭義隆降三桂冬十月
進忠乞援國軒分兵營新墟與可喜相持潮州圍解十

一月三桂兵守七盤朝天諸關官兵餉絕退屯廣元來
嘉克陷竹谿中鋒寨十二月癸巳陝西提督王輔臣兵
叛甯羌經畧英洛遇害大將軍貝勒董額退保漢中延
齡兵攻懷集欽州給事中蘇拜往招輔臣十四年春正
月精忠將黎化中與三桂兵合攻連州乙酉興安兵變
殺總兵王懷忠三桂兵據廣元朝天諸關鄂秦統盛京
大兵防守太原精忠將沙有祥據桃花嶺克處州輔臣
兵陷蘭州巡撫花善奔涼州二月經遣何祐攻饒平獲
續順公沈瑞歸投懷安侯三月來嘉攻南漳爲總兵劉
成龍所敗畢力克圖統大兵拒輔臣於大同輔臣兵連
陷定邊花馬池察哈爾布爾尼以兵叛佟國綱統大兵

鎮宣府夏四月國軒入潮州使何祐奮擊可喜而白帥
驍騎繼進大敗可喜於盤頭山追奔四十餘里斬級二
萬囚是湖南諸縣皆聞風納降軍聲大振初黃梧降精
忠封平湖公而遣黃藍北使梧忽見厲擊頭生瘍死芳
度襲公恐精忠誅又降於經討前提督德化公至是聞
又有貳志經乃自將南征將道漳州襲執之芳度不納
遣弟芳泰走廣東乞援亦以其多反側莫應來嘉興洪
福合攻南漳陷穀城輔臣兵陷延安綏德冬十月輔臣
與大兵戰固原殺副將太必圖提督陳福逃薊州馬雄
等攻陷高雷廉瓊等處十一月芳度將吳淑與其弟潛
以城降經人芳度投開元寺

府治西北

東井中不死出而斬

之斲梧棺支解其尸夷黃氏無少長皆死授淑後提督
平南將軍潛戎旗一鎮許贊提學葉亨知府守興泉道
以陳啟泰拒精忠死故禮葬之十二月甯夏兵變陳福
死十五年春正月以畢力克圖鎮甯夏康親王大兵將
至精忠將邱飛龍等一百五十餘員就撫經遣劉國軒
劉進忠由普甯南路蔡文許貴由大埔程鄉北路會攻
惠州三桂兵會攻廣州肇慶二月碣石總兵苗之秀降
經授宣毅前鎮滅鹵將軍三月尙之信守其父可喜降
三桂鎮南將軍舒恕等引還副都統莽依圖自肇慶突
圍走總督金光祖巡撫佟養鉅陳洪明提督嚴自明副
將王啟秀等降三桂三桂使之信與經通和經使國軒

守惠州進忠守潮州薛進恩吳淑統五將軍會攻江西
道汀州襲降精忠將劉應麟以爲前提督奉明伯遂略
下會昌瑞金諸縣精忠將馮公輔等陷宣平夏五月黨
哈里擊走之六月圖海招王輔臣降假靖寇將軍立功
贖梟精忠將耿繼善及建昌新城諸守者皆燒營遯康
親王知精忠爲經所偏遂檄諸將乘機速進秋八月都
統賴塔等敗精忠將馬九玉等於衢州復江山九月胡
圖等會擊又連敗之復常山賴塔馬哈達等進攻仙霞
關降其將金應虎遂復浦城精忠殺范承謨賴塔紀爾
他布等克建陽連克建甯精忠將王進功郭炳興降經
授進功中提督匡明伯令炳興守長泰冬十月令許

襲取興化以烏龍江爲界馬成龍朱雲龍朱天貴俱降授成龍援勦左提督靖鹵伯雲龍樓船中鎮天貴水師一鎮康親王師抵延平精忠將耿繼美以城降精忠遣子顯祚納印迎王師至福州精忠率諸文武降還精忠爵如故率所部從征自効遂復溫州處州十一月副都統雅泰總兵許貞敗耿繼善於南豐經遣許耀襲福州爲都統喇哈達等所敗王師抵烏龍江或勸耀扼將軍山勿使得渡不聽又請乘半渡擊之不聽既渡耿兵在前滿兵在後并力擊耀耀眾大潰經令何祐趙得勝拒守興化時吳淑方由汀州進取邵武十二月耿繼善棄城走守將楊德降授後勁鎮淑兵進攻延平爲副都統

穆赫林所敗守將彭世勳以城降北天大雨雪淑兵利
跣足疾走因是敗潰思歸淑遂棄邵武不守薛進思在
汀州將棄城走劉應麟固留且快一戰不聽應麟乃自
殺其妾率妻子奔潮州是月三桂殺孫延齡以其眾隸
線國安尙之信遣人詣簡親王營乞降立功自効舒恕
等擊敗嚴自明等於南康

臺灣鄭氏始末卷六

德清沈雲撰

烏程沈 珪注

十六年春正月大軍抵興化城下祐中敵聞疑得勝有貳使先當敵戰敗祐不敢援得勝歎曰與若共不亡何待乃挽强射數人以死祐率敗軍遯還大軍遂入興化分下汀州建甯泰甯長汀甯化清甯歸化連城會昌新城二月林惟仁守周公源口亦棄營遯大軍攻泉州守將皆遯大軍攻經新泉經以諸將皆中閒計無固志遂棄漳州及海澄等十縣遯入廈門三月王移師潮州以莽依圖爲鎮南將軍會勦粵東使姚啟聖說劉進忠苗之秀並以原官從征進忠曰我率諸鎮皆總兵今與若

敵其何以率尋以伯爵授進忠討逆將軍進忠遂遣諭
惠州陳璉夏四月莽依圖師至南安嚴自明以城降遂
克南雄抵韶州傅宏烈迎降授宏烈廣東巡撫五月尙
之信以廣東降六月祖澤清以高雷廉降進忠以潮州
降尙可喜卒於軍以子之信襲封平南親王授宏烈撫
蠻威烈將軍經會文武議棄烏龍江汀州邵武臯誅薛
進思許耀黜進思兄子常霖而以全軍畀國軒總統分
遣鎮將守東石深泥日湖丙州諸澳秋七月國軒自惠
州攻東莞將趨廣州之信會大兵圍擊大敗之遂克惠
州降璉有白頭賊蔡寅者自稱朱三太子常率眾出沒
南安同安間爲經緯援八月三桂分兵攻韶州桂林經

遣吳淑會寅據長泰天成寨縣東南三十餘里九月提督段應

舉夜潛軍襲破之冬十月啟聖至廈門招經受冊封奉

正朔稱臣納貢通商販比島夷例經以箕子未嘗奉周

朔辭乃移諸降將東渡劉炎不願東徙聽自就撫去十

二月遣國軒襲泉州爲副都統楊鳳翔提督段應舉所

邀不克寅應三桂攻欽州爲遊擊劉士貴敗遯還韓大

任據萬安之梁口應三桂十七年春正月舒恕等追敗

之於鷓鴣寨大任遯汀州二月率所部降國軒潛軍襲

玉洲漳州東三漢河南溪九龍江會合之所福河府東南四十五里下許

諸堡皆下進取石馬鎮在海澄北十五里斷江東橋即虎渡橋跨柳營江上

經自將攻泉州爲應黃芳世等禦國軒參將朱起龍等

禦經經佯敗堅壁守而分兵西趨合擊芳世大敗之遂
取平和漳平金光祖白潯進兵莽依圖白平樂接戰爲
三桂兵所敗三月祖澤清聞大兵失利復叛降三桂副
都統孟安副將楊壯猷統驍騎援石馬國軒與戰却經
遣將楊甯會蔡寅屯天寶山而自督諸將急攻泉州安
等還兵圍天寶力戰甯中流矢死寅遂退壁不出閏三
月芳世復會兵圍寅寅軍乏食夜突圍遁安等復偪沿
海界外居民徙內地中海禁接濟交通寅乘閒招集得
數千人攻安溪時侍講學士李光地以憂居練鄉兵與
知縣李鉅計破寅寅蹙降經授前鋒鎮三桂將林興珠
詣安親王軍降封列侯授建義將軍芳世會副都統穆

赫林攻平和國軒迎擊經遣寅伏灣腰樹而自率奇兵
焚其營國軒乘之芳世大潰雜敗卒遞穆赫林遇伏大
驚三合圍取無免者經故縱穆赫林五騎亡去乘勝進
取潮州都統雅塔里統大軍來援夏四月袁本秀據慶
陽應三桂澤清攻電白敗將軍額楚又連敗之克高州
與之信戰不利遂棄高州本秀爲大將軍圖海所敗死
五月總兵馬三奇攻經潮州段應舉營祖山頭攻國軒
前鋒統領希福及穆赫林大軍營海門左右總兵黃藍
統重兵駐海澄餉軍爲聲援國軒遣羸兵營應舉而別
帥步卒齎火器襲山後應舉軍傷火石死者過半諸軍
皆趣守海澄告急請益兵將軍賴塔帥師赴援經會國

軒并力圍海澄夜掘濠數重通潮水以阻援兵絕餉道遺數百人多燃火執幟僞爲援兵至者藍等統大兵出戰左右伏起橫擊而遙望燃火皆滅以爲援兵盡覆眾大驚爭擁踐入城國軒密遣勇士礮敵衣幟雜逃軍進焚其芻糧積貯火光達旦六月辛未賴塔大軍欲乘尸填濠以渡經鼓諸將乘半濟掩擊又大敗之賴塔遁還泉州壬辰海澄破穆赫林應舉白緝三桂兵克永興都統伯宜理布護軍統領哈克山皆死遂據河外營尙之信移鎮潮州總兵班紹明宋思微益兵守泉州三桂兵又敗碩岱于郴州經旣克海澄遣祭穆赫林等收其眾三萬餘人入海官軍死者十餘萬人潰者且數十萬

遣吳淑等乘勢取長泰經白將圍漳州不克遂遣國軒
攻同安而白撤圍取南安惠安秋七月國軒遇守將王
應奎副將馮昭京拒戰大敗之副都統雅塔里統大軍
來援多火器國軒營輾壁周外深濠堦若爲久計每挑
戰佯敗輒走大軍徑前奮擊而國軒反在大營後鼓噪
馳擊已禽應奎走昭京雅塔里急退不得前隊洛濠堦
倒戈自亂不能軍乃以數十騎遁兵仗輜重盡沒南安
惠安聞風皆降紀爾他布石調聲來援國軒伏兵徼之
又大潰副都統岳爾多馬思文路遇經將陳諒截戰亦
失利遜紀爾他布等退保興化國軒使人斷洛陽橋泉州
東北二十里會經將吳正璽圍泉州岳爾多等復率兵
跨洛陽江上

來援堅壁不戰時提督侯襲爵總兵馬三奇守潮州遣

兵來援總督姚啟聖遣總兵林賢潛軍攻克平和八月

賢敗樓中鎮蕭琛於定海

所在連江東北八十里

經遣陳諒拒賢

辛未三桂病中風噎隔有犬登其案而坐病甚口不能

張手書永明字庚辰下痢乙酉死馬寶胡國柱立其孫

世璠九月賢兵進攻同安巡撫吳興祚帥標兵赴援攻

復永春德化啟聖會平南將軍賴塔督大兵進攻國軒

國軒攻泉益急而蕭琛遣人馳報將軍喇達哩提督楊

捷統滿漢兵興祚帥閩安水師並至眾將士益懼國軒

恐內變遂斷南門二橋遏追兵全軍道南安金雞橋雪

嶺抵同安知琛妄報以告經遂斬琛流其妻子於淡水

啟聖等遂入泉州興祚募水師遣賢統以出海經遣蔡
沖瑯禦之赤澳大戰却之興祚因請仍置水師提督以
備水戰大兵遂克同安啟聖以多金賂國軒左右廖瑒
等令爲之閒而自督捷等會賴塔圖國軒於蜈蚣山大
戰敗之斬四千餘級國軒退據長泰江東窺漳州冬十
月啟聖伏卒深箐中設營壘躬帥捷等挑戰三戰三卻
國軒盡銳前進奪取其營捷等佯遯國軒方據營安撫
夜半伏卒突起啟聖捷還軍掩擊國軒軍大亂遂乘馬
浮水遯鎮將吳正璽等戰死廖瑒等及眾一萬二千餘
人皆降大軍入長泰國軒既去江東寨退保三汊河觀
音山諸處十一月啟聖修江東杉橋開修來館以招降

者與興祚口出金幣縱閒使歸則隆禮甘言立請封授
無吝色至十八年春正月凡招撫蔡冲琬等及軍士一
萬五千餘人按勦左鎮陳諒襲破官兵於定海甲寅國
軒攻長泰副都統紀爾他布會興祚夾擊大敗之三月
侯襲尙敗揚金日等於山頭仔喇達哩破東石寨陳深
戰死夏四月國軒屯玉洲吳淑屯蕭井寨相犄角丁丑
夜大雨淑爲寨牆壓死國軒馳往慟哭曰是又斷吾
一臂矣五月國軒攻江東橋將軍賴塔統大兵迎戰轉
戰及潦窪處國軒豫布竹籤鐵蒺藜泥淖中而長兵鈎
距環伺推引北兵人馬顛蹶不支俘斬萬餘興祚遣將
陳亥來援國軒乘勝連大敗之降亥及其眾八千餘人

而不省其詐也及暮敗聖遣總兵王英統輕騎五千援至時經方聞捷大喜行人司傅霖諫經夜半子時癸亥晦劉將軍營離方已已敵乘貪狼將有大敗連遣黑衣軍三千山乾方進援緩且無及從之經既遣吳潛江勝前進而降亥之捷再告霖曰殆矣亥作降將及其名之時而內變也連濟師爲援而後可施鳳曰劉將軍不勝則降連勝則降遲不始終爲鄭氏也霖曰救敗如救焚王速出令霖請以全屬任劉將軍無他經乃分四將各帥精騎伏要害遣進陳亥請國軒願以所部當先自効許之臨敵力戰斬數十級奔之盡獲其輜重還置營後又使告捷於經霖曰癸亥坤五也是於象爲大有大車

以載火器也焚如棄如死如急使者還報無及矣夜半更食將畢火發營後毒燄衝士卒若醉國軒急令將士持餅缶伏而各厲兵連騎而亥所部卒奮起英遏營矢石雨注眾大驚竄國軒帥諸將突圍莫可出忽西北角評譟震擊益惶急以爲官軍重集也則潛勝皂旗黑盾倭刀背強弩三千人至矣亥眾向之皆披靡國軒遂激眾奮刃鏖戰竟斬亥頭潰西北山潛勝斷後賴塔追奔十數里遇王隆曾瑞等伏兵邂逅英收亥散卒并所部得萬餘人追潛勝截戰遇江機援兵橫擊國軒還救圍英大敗之英突圍遁散卒復集得三千餘人奔潰飢敝將曙小休而邱輝圍擊不得退乃與親軍數騎開道遁

去所部皆沒啟聖興祚益縱賂廣開略誘經國軒左右
十九年春正月祖澤清及子良楨伏誅二月楊來嘉乞
降啟聖會水師提督萬正色出閩安興祚會甯海將軍
喇哈達總兵王英等自同安分三路並進經分命諸鎮
將防禦人莫有關心乙丑國軒率三鎮拒海壇正色麾
眾大破之國軒力整營壘爲自守計癸酉啟聖會平南
將軍賴塔統水陸軍七道並進守將皆聞風納款丙子
水師將軍朱天貴自海壇遞還勸經速渡臺灣爲上策
丁丑國軒遂棄海壇與蘇堪陳昌分守玉洲石馬海澄
天貴守平海嶼經與施鳳守銅山左武衛林陞等分守
湄州南日平山崇武諸嶼江機等分守金廈左右十九

案戊寅平南軍徑取銅山鳳等思內應執經以獻鳳故
經所最親信者傅霖密告經經急執鳳等誅之然顧左
右皆莫測遂棄銅山遜廈門諸將降去同日啟聖抵海
澄堪昌皆開門納降國軒遜廈門見經相持慟哭出啟
聖與祚招書先後數十道曰諸將皆如是奈何庚辰康
親王帥玉洲等降將爲先道進取金門廈門平南軍還
屯潮州辛巳正色破天貴於平海嶼甯海軍分克南日
湄州崇武諸嶼壬午經率諸心腹乘艦東渡盡以兩島
委國軒天貴甲申王師克雲霄英等破海門三月庚寅
勅啟聖督總兵趙得壽黃大來會平南軍分攻灣腰山
觀音山展旗等十九寨皆破己亥興祚督王英等會衛

海軍進攻廈門五營將軍江機等爭先迎降國軒手刃
數人不能止僅與天貴等出戰士卒不用命天貴負重
創先逃啟聖會諸軍競進眾益潰叛國軒夜棄廈門退
泊遼羅文武千餘員水陸兵數萬出降大軍遂取金門
俘獲無算啟聖興祚並敘功予世職啟聖加太子少保
興祚擢兩廣總督夏五月天貴窮蹙乞降啟聖待之有
加禮表爲浙江平陽鎮總兵復遣人持書幣招國軒謝
使者曰善報熙止努力事事勿復以國軒爲念海水若
涸我心則降士爲知己者死國軒受延平兩世信任無
有貳參且天下多才何汲汲於二姓臣是貴若天不殄
明延平再振國軒敢不束矢操戈追隨熙止以當嘉貺

也六月東渡見經經惘惘病若失政無巨細委馮錫範錫範澄世子也經初娶唐氏妬悍無子妾林氏生男克塋唐嫉謂非經出欲害之經乃秘之他所他妾再生男則又告顯悅以爲私乳媼所生遂搆大難幾滅族實則夕御更迭雖經與董夫人莫察也克塋娶陳永華女臺灣新闢倚永華綜覽上下晏如經旣西渡克塋監國性精毅諸將嚴憚似成功永華時以寬濟之十數年生養恬謐經得以無東顧憂唐氏死經再娶錫範女生子克塋兩島旣失經東歸憂憤遇事輒暴怒少可似成功當日老成若永華等皆物故錫範因采倭取媚遂竊柄政擅威福經病迷眊益構扇帷幄間肺腑大臣皆側目國

軒知事不可爲經又無能與語他多新進難深結徒日
與左虎衛何祐行人傅霖輩相向歎恨而已二十年春
正月經病卒時成功子聰等九人孫克壘弟克舉等十
人克壘年十三最幼錫範構諸將及聰等畏克壘嚴以
克壘幼懦易與遂白董夫人克壘非經出曉收監國印
執幽別室夜拉殺之妻陳氏自縊死遂立克壘稱永歷
三十有五年董夫人憂恚成疾夏六月卒錫範封忠誠
伯攝行政事畏國軒封武平侯晉鎮國公何祐謀殺錫
範不得聞諸將各懷異志啟聖因遣使弔喪陰以多金
賂左右使爲閒而密陳規取臺灣事復施琅爲水師提
督以計誘行人傅霖殺之以忠謀鄭氏故也秋七月改

萬正色爲陸路提督會琅及將軍總督等進取澎湖及

浯嶼遇國軒大戰正色軍先敗遞去吳潛追至嵩嶼

海澄

東又敗之國軒竄瑯於嘉禾幾獲琅而啟聖先在丹霞

降建威後鎮朱友使向導前進援琅琅得跳海門啟聖

復爲琅陳請使守水師如故冬十一月大軍平雲南吳

世璠自殺戮其尸傳首京師降其將方光琛等二十一

年春正月分三桂骸骨於各省梟世璠首級耿精忠劉

進忠徐文耀王世瑜白顯忠江元勳曾養性王振邦蔣

得輅凌遲梟示巴養元等五人斬梟示夏國相等凌遲

精忠子顯祚黃國瑞林芳孫廖庭雲李似桂夏季旺呂

應斗武灝司定猷沈偉郭景汾羅萬里祖宏勳陳儀陳

斌呂八及提督李木深其孫象乾象坤其弟子濟祥濟民張國柱高起隆漸決條交內務府入旗啟聖督水陸軍出定海所風逆回廈門與琅計進取琅曰海洋呼吸須時攻臺灣宜候寒暑均平西南風便而後可此專責琅奉公指揮足矣公先伐謀俾其攜貳琅承命一舉掃蕩力耳何煩過計夏六月國軒大修戰艦繕甲兵錫範笑曰吳耿尙三王皆靡延平乃賴公獨存國軒曰東甯地什湯武沃壤宜耕穀蔬果實少歉多豐又有糖鹽竹木之饒交市商舶鹿麝珍禽名材異卉皮甲銅鐵不可勝用練卒百萬繕艦數千銃礮神器硝磺怪藥不待他求環海依山天限莫入見利則略地進取沿海皆通無

利則堅守力農人人自給幸投天隙以圖竊王舉天下
無足抗耳若夫天命靡常人心鮮固內憂外患交訌游
乘則桀紂富有四海亡可翹足待也冬十月國軒屯彭
湖築礮城十餘所扼諸險隘二十二年春三月何祐城
淡水時啟聖謀自北來襲故備之夏五月琅統舟師集
廈門總兵朱天貴林賢泊銅山六月壬午琅會諸軍奪
貓嶼花嶼丙戌屯八罩嶼啟聖駐廈門督餉國軒在彭
湖分左武衛林陞等守雞籠嶼吳潛援八罩不克死丁
亥先鋒遊擊藍理以烏船先進國軒奮擊盡沒其船禽
理遂擊琅樓船親搏戰射琅中其一目左衝鎮楊德縱
琅遂遁天貴以火器銳奔國軒鏖戰良久天貴中流矢

傷腕乃遜戊子琅退屯八罩國軒帥陳啟明王隆曾瑞

江勝分屯虎井

在八罩西八罩在澎湖大山嶼南

桶盤二嶼

雞籠在大山嶼西

嶼南桶盤在西嶼西

而白將攻琅與賢等力戰白辰至午國軒負

重創退琅遂麾諸軍夜進乘風焚殺已丑二嶼盡失庚

寅旦琅遣人持書來招且視疾國軒報曰尊侯仕明遊

擊亡歸延平復上遁逃臣事三姓此足下智若轉圜男

於舍舊提出尋常萬萬猥欲策驚末步驥塵殷殷意厚

敢不拜嘉國軒老矣君存與存君亡與亡若一旦背而

他之卒然反噬雖犬馬有不忍爲而謂國軒不犬馬若

也詰朝相遇不盡欲言辛卯琅持書幣招錫範及諸守

將壬辰啟聖使者又至諸將皆不欲戰國軒曰以功則

三桂莫大然以撤藩窘死他皆殲殄唯琅與天貴勵存
假以毒我海氛潮以靖兩人夕以誅耳且兩軍殺掠相
當勝敗未卜何倏然即欲投燼若斯願其諸將軍決一
死戰以定去就何如皆曰唯命癸巳琅遣戰艦百餘分
取雞籠嶼四角山牛心灣而自將大艦五十六居中八
十艦居後徑攻澎湖國軒悉眾逆戰乘西北風大起擘
沉其大艦數十天貴中礮死日午風反南琅大呼銳進
賢繼合攻波濤澎湃天士皆股栗國軒疾戰不支諸將莫
進琅會諸軍圍擊氣益厲國軒大敗乘走舸從吼門遞
楊德先以部眾降陳啟明等四十七鎮將皆死澎湖遂
破旬日間凡喪偏裨三百七十餘人士卒一萬五千餘

人戰艦二百餘艘軍械輜重無算琅給降卒衣冠廩餼
還招臺灣人眾錫範首倡議降國軒與明宗室王等力
不能沮琅方書咨啟聖以臺灣水道紆回且炎酷士卒
不耐計俟八月後乘北風行啟聖謂乘勝進擊可旦夕
下遂賁功賞銀一萬兩增火器弓弩甚具趣琅進兵兵
未發而錫範先遣鄭平英等約以秋七月甲午望日詣
降甯靖王術桂白以明宗室義不可辱舉王印授克塽
具冠服拜天地二祖列宗率妾袁氏王氏秀姑荷姐梅
姐皆死錫範陳夢煒齎降表冊印籍土地府庫軍實以
獻八月庚戌琅自澎湖進發壬子入鹿耳門抵臺灣曉
諭安撫頒 赦詔克塽率聰等六人克舉等八人諸公

侯伯以下盡以其屬歸京師其降卒願歸農家聽琅封靖海侯明年設臺灣巡道一知府一知縣三臺灣鳳山諸羅總兵副將各一兵八千澎湖副將一兵二千克塽至京隸漢軍封公爵國軒順清侯天津衛總兵錫範順清伯何祐梧州副將餘各封賞有差後六年以成功受封明室非他僭竊比令與其子經之喪歸葬南安鄭氏自芝龍至克塽凡四世臺灣自成功建國至歸入版圖凡二十三年

問亭子曰世言鄭氏之先遇異人指一葬地名五馬渡江又傳萬厯中雷震一石有草雞夜鳴長耳大尾凡五十六言以爲鄭氏興亡之讖辭甚俚鄙疑好事者所爲

余故不戰夫芝龍起於海角糜爛東南受撫之後翦除羣盜其功有足錄者逮援立唐藩擁兵驕恣首鼠兩端王師甫臨反顏歸命爲臣不忠終彼誅戮固其宜也成功生有異徵雖桀大吠堯而翊戴明室至死不貳易所稱幹父之蠱者豈其人乎瓜州之役嚮使勝國有人出洞庭下江南首尾相應豈易撲滅卽不然而坐據淮揚分兵略地南北之勢忽焉中斷事猶未可知也天命有在旣非知力所能爭旋師海外肇啟東土闢番夷爲郡縣易鱗介爲衣裳勸學屯田規模宏遠求諸史冊幾難數觀昔項羽以蓋世雄才戰無不勝垓下一戰遂至灰滅以成功方之殆未知孰爲優劣矣子經下士禮賢

拘拘儒雅而釁生衽席變起蕭牆得國之始亦已多故
況復輕信閒謀自殘股肱以致兩島淪沒人心瓦解值
耿藩構亂略有數郡爰及末年得不償失延平之業衰
焉克塽童稚政在外戚嗣位未幾遂爲俘虜昔紅夷有
眾一旅據守安平攻圍期年猶不能克今澎湖雖破全
臺南北固無恙也而旬日之間國祚傾覆傳曰天之棄
商久矣君將興之弗可赦也已其是之謂乎

後跋

臺灣鄭氏始末六卷家問亭孝廉所著書也余以海島
洲嶼名目錯雜相混因取方輿紀要水道提綱一統志
等書附注於下以便省閱有譌誤者卽以己意辨之戊
戌新秋南江漁父沈堯

臺灣鄭氏始末紀六卷德清沈雲撰烏程沈垚註撫拾
詳盡信而有徵足備史家之參攷成功父子闢地海外
自保一隅延及三世有明遺老矢志不食周粟者類皆
航海東渡往依鄭氏臺灣文化之盛與各行省相埒皆
鄭氏先導之功也家厚堂教諭堃於道咸間有傳經堂
叢書之刻經子而外旁及史類未歲事而遭亂板毀書
目亦不及刊故傳經堂一書外間絕少流傳同邑劉子
翰怡以表揚前哲爲職志因檢寄傳經堂已刻本十餘
種翰怡深賞是書先行付梓慨自甲午一役臺灣爲日
所得其地不復隸我版圖讀是編者當益增河山今昔
之感云庚申孟秋吳興凌福鏡用臧氏跋

臺灣鄭氏始末六卷沈雲撰沈雲字聞亭德清人
道光甲辰進士官廣西興安知縣嘗取閩人江日昇臺
灣紀事四十九篇參考他書加以潤色自天啟甲子歲
鄭芝龍倡亂至康熙癸亥其曾孫克塽投誠而止子敦
又以海島洲嶼名目錯雜相混因取方輿紀要水道提
綱一統志等書附注於下以便省閱有譌誤者卽以已
意辨之是書於成功江甯一役驕矜取敗他書不若此
本之詳八單一役藍理重傷此本以爲禽理亦誤蓋首
尾全備瑜多瑕少故重刊之歲在屠維協洽季秋朔霜
降日吳興劉承幹跋